

ԼԵԶՈՒԱԲԱՆԱԿԱՆ

ԱՐՏԱՅԱՅՏԱԿԱՆ ՀԱՄԱԿԱՐԳԻ ՊԱՏՄՈՒԹԻՒՆԻՅ

Հստ Գ. Զահուկեանի, Ֆ. Խլղաթեանի՝ արտայայտչականութիւնը ոճի այն յատկութիւնն է, որ ազդում է ունկնդրի կամ ընթերցողի զգացմունքների ու տրամադրութեան վրայ, թոյլ չի տալիս նրան անտարբեր լինել խօսողի եւ խօսքի նկատմամբ¹: Հայ ոճագիտական մտքի պատմութեան մէջ անդրադարձ է կատարուել արտայայտչական հետեւեալ միջոցներին՝ ճարտասանական դարձոյթներ, կրկնութիւններ, աստիճանաւորում, շրջադասութիւն, խօսքի զեղչում, հակադրութիւն եւ այլն: Հստ մեր ձեռքի տակ եղած տեսական աղբիւրների՝ ներկայացնենք լեզուաբանների դիտարկումները արտայայտչական վերոնշեալ միջոցներից մի քանիսի վերաբերեալ:

Ճարտասանական դարձոյթներ: Ճարտասանական դարձոյթներն են ճարտասանական հարցը, ճարտասանական բացականչութիւնը, ճարտասանական դիմումը: Այս միջոցների ոճական արժէքը առաջիններից մէկը ներկայացրել է Գ. Վահանեանը: Նա գրում է. «Ուժեղ զգացմունքները յաճախ արտայայտուում են լեզուական յատուկ միջոցներով, որոնք ճշտութեամբ են դրսևորում զգացմունքը, աւելի ուժեղ եւ ազդեցիկ են դարձնում խօսքը: (...) Խօսքը բազմազան եւ հետաքրքիր դարձնելու համար խօսողը կամ գրողը օգտագործում է մտքի, զգացմունքի արտայայտման ճարտասանական ձեւերը»²: Լեզուաբանը բնութագրում է ճարտասանական հարցը եւ ճարտասանական բացականչութիւնը, նշում, որ յաճախ հեղինակը հարց է տալիս եւ իսկոյն պատասխանում, չհասկանալով ճարտասանական հարցի էութիւնը, իր միտքը, զգացմունքը արտայայտում է բացականչութեամբ՝ դիմելով այս կամ այն առարկային: Գ. Վահանեանի դիտարկմամբ, ճարտասանական դարձոյթները յաջող կիրառել է Թումանեանը: «Թումանեանի վարպետութիւնը, նրա ոճի առանձնայատուկ կողմն այն է, որ ճարտասանական հարցը, ճարտասանական բացականչութիւնը, խօսքի դինամիզմը ապահովող բայերի, ստորոգեալների առատութիւնը, կարճ, դիպուկ նախադասութիւնները, բառերի իմաստային ծանրաբեռնուածութիւնը եւ վերջապէս յուզականութիւնը ուժեղացնող կրկնութիւնները միաձուլուելով մի ամբողջութեան մէջ, իրար լրացնելով ստեղծում են յուզիչ խօսք, սրտառուչ պատկեր»³:

Գ. Զահուկեանը, Ֆ. Խլղաթեանը հիմնաւոր անդրադարձել են յատկապէս ճարտասանական հարցին: Նրանք ճարտասանական հարցը սահմանում են հետեւեալ կերպ. «Ճարտասանական հարց է կոչւում հարցական նախադասութեան օգտագործումը ոչ թէ պատասխան ստանալու, այլ միտքն ուժեղացնելու, խօսքին անմիջականութիւն եւ արտայայտչականութիւն հաղորդելու համար»⁴: Հստ նրանց՝ ճարտասանական հարցը խօսքին արտայայտչականութիւն է հաղորդում՝ մենախօսութեանը տալով երկխօսութեան ձեւ: Ճարտասանական հարցը, ըստ էութեան, պարունակում է իր պատաս-

¹ Գ. Զահուկեան, Ֆ. Խլղաթեան, Հայոց լեզու: Ընդհանուր գիտելիքներ: Ոճաբանութիւն, Երեւան, 1976, էջ 57:

² Գ. Վահանեան, Հայոց լեզուի ոճաբանութեան ձեռնարկ, Երեւան, 1956, էջ 97-99:

³ Նոյն տեղում, էջ 98-99:

⁴ Գ. Զահուկեան, Ֆ. Խլղաթեան, Հայոց լեզու: Ընդհանուր գիտելիքներ: Ոճաբանութիւն, Երեւան, 1976, էջ 75:

խանր: Ֆ. Խլղաթեանը յաւելում է, որ ճարտասանական հարցը խօսքին հաղորդում է յուզարտայայտչական երանգ, ուժեղացնում է խօսքի թափը եւ առանձնապէս շատ է հանդիպում մենախօսութիւններում, չափածոյ եւ դրամատիկական ստեղծագործութիւններում⁵:

Ոճագէտ Պ. Պօղոսեանը ճարտասանական հարցը, ճարտասանական բացականչութիւնը, ճարտասանական դիմումը ներկայացնում է որպէս նախադասութիւնների ձեւեր: «Բոլոր այս ձեւերի համար ընդհանուրն այն է, որ յոյզի, զգացման յարուցումը կապուած է ոչ թէ բառի կամ կապակցութեան իւրայատուկ գործածութեան, այլ ամբողջ նախադասութեան կառուցուածքի, աւելի ճիշտ՝ մտքի արտայայտման յատուկ եղանակի հետ»⁶: Որպէս նորութիւն՝ լեզուաբանը քննել է այս միջոցները կառուցուածքային տեսակէտից: Այսպէս՝ ճարտասանական հարցը կառուցուածքային տեսակէտից ունի մի առանձնայատուկութիւն. հաստատական նախադասութիւններով արտայայտուած է մտքի ժխտում, իսկ ժխտական նախադասութիւններով՝ հաստատում⁷: Հեղինակը բերում է բնութագրական օրինակներ ճարտասանական բոլոր դարձոյթներով:

Ճարտասանական դարձոյթների վերաբերեալ կարելոր դիտարկումներ ունի Ա. Մարութեանը: Ըստ նրա՝ սրանք ծառայում են խօսքի արտայայտչականութիւնն ուժեղացնելու նպատակին: Լեզուաբանը նշում է, որ «կարելորն այն չէ, թէ ճարտասանական հարցական նախադասութիւնների միջոցով ի՞նչ դատողութիւններ են արտայայտուած, այլ այն, թէ դրանք յուզական ի՞նչ բեռնուածութիւն եւ ոճական ի՞նչ արժէք ունեն գեղարուեստական խօսքի մէջ»⁸: Վերլուծելով ճարտասանական դարձոյթները՝ բերում է հետաքրքրական օրինակներ, վիճակագրութիւններ: Այսպէս՝ Գր. Նարեկացին «Մատեան ողբերգութեան» 30-ից աւելի գլուխներ սկսում է ճարտասանական դիմումով առ Աստուած:

Ճարտասանական երեք դարձոյթները ամփոփ ներկայացրել է նաեւ Լ. Եզեկեանը: Նա կիրառում է ճարտասանական կոչ տերմինը: Ըստ հեղինակի՝ ճարտասանական կոչերը հիմնականում պայմանաւորուած են հեղինակի կամ որեւէ անհատի տրամադրութեամբ եւ մեծ մասամբ վայրկեանական տպաւորութեան կամ ոգեւորութեան արդիւնք են⁹: Հարցի ուսումնասիրութեան մէջ նոր բան գրեթէ չի յաւելում:

Ժամանակակից լեզուաբանների կարծիքով, այս միջոցը կիրառելի է յատկապէս բանավիճային խօսքում, կամ երբ խօսողը լսարանի առջեւ քննարկում է վիճելի խնդիր, որը ակնյայտօրէն կարող է տարակուսանք ու նաեւ հարցումներ առաջացնել¹⁰: Ճարտասանական դարձոյթների կիրառմամբ ակտիւանում է խօսքի ազդեցութիւնը՝ դառնալով աշխոյժ, բազմազան:

Կրկնութիւն: Մեր տպաւորութեամբ, հայ իրականութեան մէջ կրկնութեան առաջին յստակ սահմանումը տուել են Գ. Զահուկեանը, Ֆ. Խլղաթեանը: Նրանք գրում են. «Կրկնութիւնը այն բանադարձումն է, որի դէպքում միեւնոյն բառը, բառակապակցութիւնը կամ նախադասութիւնը ասւում է երկու կամ աւելի անգամ՝ խօսքն աւելի արտա-

⁵ Ֆ. Խլղաթեան, Ոճաբանական տերմինների բառարան-տեղեկատու, Երեւան, 1976, էջ 67:

⁶ Պ. Պօղոսեան, Խօսքի մշակոյթի եւ ոճագիտութեան հիմունքներ, գիրք երկրորդ, Երեւան, 1991, էջ 178:

⁷ Նոյն տեղում էջ 179:

⁸ Տէս Ա. Մարութեան, Հայոց լեզուի ոճաբանութիւն, Երեւան, 2000, էջ 177:

⁹ Լ. Եզեկեան, Ոճագիտութիւն, Երեւան, 2006, էջ 361:

¹⁰ Եռ. Աւետիսեան, Ա. Սարգսեան եւ ուրիշներ, Հայոց լեզու եւ խօսքի մշակոյթ, Երեւան, 2016, էջ 261:

յայտիչ դարձնելու, նրա յուզականությունն ուժեղացնելու նպատակով»¹¹։ Հեղինակները կրկնութեան դրսևորումներ են դիտարկում զուգահեռականությունը (շարահիսսական կառուցումաձևի կրկնություն), խաչաձևումը (կառուցումաձևի շրջումը)։ Ֆ. Խլղաթեանը իր «Ոճաբանական տերմինների բառարանում» ընդգրկել է կրկնաբերություն տերմինը, ինչը հնչյունների, բառերի, արտայայտությունների կրկնութեան վրայ հիմնուած բանադարձումների ընդհանրությունն է¹²։

Լստ էդ. Ջրբաշեանի, Հ. Մախչանեանի՝ կրկնութեան ամենատարածուած տեսակներն են՝ ա. հնչյունային կրկնակները (յանգ, առձայնոյթ, բաղաձայնոյթ), բ. բառային կրկնակները (նոյնաբանություն, աստիճանաւորում, յարակրկնություն, վերջոյթ), գ. դարձուածքային կրկնակները (զուգահեռականություն)¹³։ էդ. Ջրբաշեանը խորութեամբ ուսումնասիրել է յատկապէս բառական կրկնությունը, ինչը դիտարկում է որպէս խօսքի նշանակութեան ընդգծման շարահիսսական միջոց։ Լստ նրա՝ յաճախ բառական կրկնութեան հանդիպում ենք չափածոյ ստեղծագործություններում։ Հետազոտողը մեկնաբանել է բառական կրկնութեան տեսակները՝ բերելով գործածութեան բնութագրական տարբեր օրինակներ գեղարուեստական գրականությունից։

Հայ ոճագիտական մտքի պատմութեան մէջ կրկնութեանը, տեսակներին, դրանց ոճական արժէքին հիմնաւոր անդրադարձ է կատարել Պ. Պօղոսեանը, որը, ուսումնասիրելով յաւելումով կազմուող ձեւերը, առանձնացրել է կրկնությունը, կրկնապատկերությունը, երկրորդումը, բաղհիսումը, դարձը, համաստիճանությունը, շղթայակցումը, աստիճանը, առաւելումը, բազմաշաղկապությունը, բազմալծությունը, յապաղումը¹⁴։ Ոճագէտը ընդգծում է, որ կրկնութեան կարող են ենթարկուել ամենատարբեր միաւորները. իւրաքանչիւր միաւորի կրկնություն ունենում է իրեն յատուկ ոճական լիցքաւորում։

Յետագայ ուսումնասիրողները (Ա. Մարութեան, Ն. Վիրաբեան, Լ. Մարգարեան, Լ. Եզեկեան) հարցի ուսումնասիրութեան ոլորտում գրեթէ չեն յաւելում նոր բան։

Ժամանակակից հետազոտողները ամէնից յաճախ հանդիպող արտայայտչամիջոցներից են համարում լեզուական միաւորների ոճական կրկնությունները։ «Կրկնությունը սահմանուած է որպէս ոճական այնպիսի բանադարձում, որի էությունը որոշակի սահմանափակ համատեքստային միջակայքում լեզուական նշանների՝ բառերի, բառակապակցությունների, նոյնիսկ առանձին նախադասությունների կրկնությունն է՝ խօսքին յաւելեալ արտայայտչականություն հաղորդելու նպատակով»¹⁵։ Թ. Շահվերդեանը որպէս կրկնութեան տարատեսակներ է դիտարկում յարակրկնությունը (նոյնասկիզբ), կցուրդը, բազմաշաղկապությունը։ Հեղինակին յաջողուել է հիմնաւոր ներկայացնել կրկնությունը, նրա տեսակներն ու ոճական գործառնությունները։

Կրկնութեան մասին կարեւոր դիտարկումներ ունի Ա. Կարապետեանը։ «Կրկնությունը՝ որպէս հաղորդակցման գործընթացում բառիմաստի կամ հաղորդման իրավիճակային ինքնադրսևորման արտայայտություն, ընդգրկում է խօսքը կամ ողջ շարա-

¹¹ Գ. Զահուկեան, Ֆ. Խլղաթեան, Հայոց լեզու։ Ընդհանուր գիտելիքներ։ Ոճաբանութիւն, Երևան, 1976, էջ 67-68։

¹² Ֆ. Խլղաթեան, Ոճաբանական տերմինների բառարան-տեղեկատու, Երևան, 1976, էջ 49։

¹³ Էդ. Ջրբաշեան, Հ. Մախչանեան, Գրականագիտական բառարան, Երևան, 1980, էջ 165։

¹⁴ Պ. Պօղոսեան, Խօսքի մշակոյթի եւ ոճագիտութեան հիմունքներ, գիրք երկրորդ, Երևան, 1991, էջ 102։

¹⁵ Թ. Շահվերդեան, Ոճագիտութիւն, Երևան, 2010, էջ 198։

հիւսական համակարգը»¹⁶։ Նա շրջանառութեան մէջ է դրել կրկնութեան շարք տերմինը, ամենայն մանրամասնութեամբ ներկայացրել կրկնութիւնը յատկապէս շարահիւսական մակարդակում։ Հեղինակի մեծարժէք աշխատութիւնը ներդրում է հայագիտութեան մէջ։

Յ. Յովհաննիսեանը, ուսումնասիրելով պերճախօսական հնարները, առանձնացնում է կրկնութեան պարզ եւ բարդ, անընդհատ եւ մերթ ընդ մերթ (միջակայքային) ձեւերը¹⁷։

Նշենք, որ կրկնութիւնից պէտք է տարբերակել կրկնաբանութիւնը, ինչը մերժելի երեւոյթ է, տրամաբանական սխալ, ըստ էութեան, ոճական թերութիւն։

Հակադրութիւն։ Մեր ձեռքի տակ եղած աղբիւրների հիման վրայ կարելի է նշել, որ մեզ հետաքրքրող ժամանակաշրջանում հարցի քննութեան առաջնեկը Գ. Վահանեանն է։ Նա գրում է. «Երկու առարկաների, երեւոյթների կամ պատկերների իրար հակադրելը արւում է խօսքի տպաւորութիւնը ուժեղացնելու նպատակով»¹⁸։ Այս արտայայտչական միջոցը կիրառւում է բանաստեղծական լեզւում, գեղարուեստական արձակում, հրապարակախօսութեան մէջ։

Ըստ «Ոճաբանական տերմինների» բառարանի՝ հակադրութիւնը իմաստային տեսակէտից հակադիր բառերի կամ դարձուածքների զուգորդման վրայ հիմնուած բանադարձումն է¹⁹։ Գ. Զահուկեանը, Ֆ. Խլղաթեանը հարցի ուսումնասիրութեան ոլորտում կատարել են կազապարային վերլուծութիւններ, գրեթէ չեն յաւելել նոր բան։

Էդ. Զրբաշեանը հակադրութեան տեսակներից է համարում կատախրեզն ու օքսիմորոնը, «երբ տարբեր կամ նոյնիսկ սուր կերպով հակադիր իմաստ ունեցող բառերը ոչ միայն դրւում են կողք կողքի, այլեւ կազմում են մի ամբողջական լեզուական միաւոր (որոշիչ եւ որոշեալ, ենթակայ եւ ստորոգեալ, նախադասութեան համազօր անդամներ եւ այլն)»²⁰։ Հեղինակը բերում է բառական հակադրութեան օրինակներ գեղարուեստական գրականութիւնից, նշում, որ բառական հակադրութիւնը հայ պոեզիայում յաջողութեամբ կիրառել է յատկապէս միջնադարեան հայ բանաստեղծ Ֆրիկը։

Հետաքրքիր հարցադրումներով ուշագրաւ է Պ. Պօղոսեանի ուսումնասիրութիւնը։ Նա քննել է ներհակութեամբ կազմուող ձեւերը՝ հակադրութիւն, հակադարձում, բաժանում, շրջում, խաչակերպ, անտրամաբանականութիւն, երկդիմութիւն, երկսայրաբանութիւն, իմաստականութիւն։ Հակադրութիւնը որակում է որպէս ոճական «ուժեղ» արտայայտչամիջոց, ներկայացնում դրա ձեւաւորման շորս եղանակ՝ ա. առարկական հակադրւում է հակադրական յատկանիշներով բնութագրուող մի այլ առարկայի, բ. իմաստով ներհակ, հակադիր գաղափարները բնութագրւում են նոյն յատկանիշով, գ. միեւնոյն առարկան ստանում է հակադրական բնութագրութիւններ, դ. հակադրութիւնը ոչ թէ գաղափարների մէջ է, այլ բառերի, եւ կամ գաղափարների միջեւ դրուած հակադրութիւնը ձեւական է, բովանդակութեան հետ չկապուած²¹։

Հակադրութեան մասին ոճաբանական վերլուծութիւնները շարունակեցին Ա. Մա-

¹⁶ Ա. Կարապետեան, Կրկնութիւնը եւ զեղչումը ժամանակակից հայերէնում, Երեւան, 2016, էջ 210։

¹⁷ Առաւել մանրամասն տե՛ս Յ. Յովհաննիսեան, Բանավէճի տեսութիւն եւ արուեստ, Երեւան, 2019, էջ 188-189։

¹⁸ Գ. Վահանեան, Հայոց լեզուի ոճաբանութեան ձեռնարկ, Երեւան, 1956, էջ 95։

¹⁹ Ֆ. Խլղաթեան, Ոճաբանական տերմինների բառարան-տեղեկատու, Երեւան, 1976, էջ 50։

²⁰ Էդ. Զրբաշեան, Գրականութեան տեսութիւն, Երեւան, 1972, էջ 267։

²¹ Առաւել մանրամասն տե՛ս Պ. Պօղոսեան, Խօսքի մշակոյթի եւ ոճագիտութեան հիմունքներ, գիրք երկրորդ,

րութեանը, Լ. Եզեկեանը, Ն. Վիրաբեանը, Լ. Մարգարեանը, որոնց ներկայացրած նիւթը մեծամասամբ նախորդների կարծիքների կրկնութիւնն է:

Ոճական հակադրութիւնների մասին կարելորդ դիտարկումներ ունի Թ. Շահուերդեանը: Լեզուաբանը փաստում է, որ ոճական այս հնարանքի կիրառման ասպարէզում հայերէնն ունի բազում քերականական միջոցներ: Նա ուսումնասիրել է հետեւեալ ներհակական կապակցութիւնները՝ հակադրութեան, ժխտման, տրոհական, պայմանաներհակական, զիջական²²: Հեղինակի ուսումնասիրութիւնը պարունակում է զգալի նորութիւններ:

Ժամանակակից հետազոտողները նշում են, որ հակադրութիւնը ձեւաւորում է հականիշների բոլոր տեսակներով, առանձնացնում են լեզուական, խօսքային կամ համատեքստային հականիշներով հակադրութիւններ, բառի բազմիմաստութեան հիմքով ստեղծուած հակադրութիւն եւ շարահիւսական հակադրութիւն²³:

Աստիճանաւորում: Ըստ մեր ունեցած նիւթերի՝ հարցի տեսական հիմունքները սկսել է ներկայացնել Գ. Վահանեանը, որը տալիս է աստիճանաւորում (գրադացիա) տերմինը: Ըստ նրա՝ այն տարածում ունի բոլոր ոճերում: Գ. Զահուկեանը, Ֆ. Խլղաթեանը աստիճանաւորումը սահմանում են հետեւեալ կերպ. «Աստիճանաւորումը այն բանադարձումն է, որի դէպքում իրար են յաջորդում իմաստով մերձաւոր բառեր՝ իմաստի աստիճանական ուժեղացմամբ»²⁴: Ֆ. Խլղաթեանը տարբերակել է բարձրացող եւ իջնող աստիճանաւորումը: Լեզուաբանները, ըստ էութեան, ներկայացրել են զուտ լեզուական մակարդակի նկարագրութիւն:

Էդ. Զրբաշեանը յաւելում է, որ բանաստեղծական երկերում պատահում են հատուածներ, որոնց մէջ իմաստն աստիճանաբար ուժեղանում է՝ համապատասխան լեզուամիջոցների ընտրութեան եւ դասաւորութեան շնորհիւ²⁵: Հեղինակը վերլուծել է աստիճանական ուժեղացման, թուլացման օրինակներ գեղարուեստական գրականութիւնից:

Յետագայ ուսումնասիրութիւններում աստիճանաւորումը բնութագրւում է որպէս արտայայտչական հիմնական միջոց: Այն խօսքին հաղորդում է իմաստային շեշտութիւն, ուժեղացնում է յուզականութիւնը, արտայայտչականութիւնը: Լեզուաբանները դիտարկում են աստիճանաւորման օգտագործումը թէ՛ արձակ, թէ՛ չափածոյ խօսքում:

Յ. Յովհաննիսեանը աստիճանաւորումը ուսումնասիրել է որպէս պերճախօսական հնար: Նա առանձնացրել է աստիճանաւորման աճող եւ նուազող եղանակները²⁶:

Ա. Գալստեանի կարծիքով, շարահիւսական այս կառույցը հիմնականում յատուկ է չափածոյ խօսքին, սակայն համապատասխան լեզուամիջոցների ընտրութեան եւ դասաւորութեան շնորհիւ ըստ էութեան արտայայտւում է նաեւ յուշագրական արձակում²⁷:

Երեւան, 1991, էջ 165-169:

²² Առաւել մանրամասն տե՛ս Թ. Շահուերդեան, Ոճագիտութիւն, Երեւան, 2010, էջ 212-217:

²³ Առաւել մանրամասն տե՛ս ԵՄ. Աւետիսեան, Ա. Մարգսեան, Ն. Ներսիսեան եւ ուրիշներ, Հայոց լեզու եւ խօսքի մշակոյթ, Երեւան, 2016, էջ 235-236:

²⁴ Գ. Զահուկեան, Ֆ. Խլղաթեան, Հայոց լեզու: Ընդհանուր գիտելիքներ: Ոճաբանութիւն, Երեւան, 1976, էջ 72:

²⁵ Էդ. Զրբաշեան, Գրականութեան տեսութիւն, Երեւան, 1972, էջ 268:

²⁶ Յ. Յովհաննիսեան, Բանավէճի տեսութիւն եւ արուեստ, Երեւան, 2019, էջ 193:

²⁷ Ա. Գալստեան, Արեւելահայ գեղարուեստական վաւերագրութեան լեզուն, գիրք Բ, Երեւան, 2021, էջ 157:

Ժամանակակից լեզուաբանները կարեւորում են աստիճանաւորման կառուցումը, այն ստեղծելով է քերականօրէն, տրամաբանական համասեռ շարքերի, թուակումների միջոցով: Աստիճանաւորման փլուզումը անխուսափելի է, եթէ առկայ է հոմանիշների ոչ ճիշտ դասաւորութիւն, իմաստային նրբերանգների շփոթ եւ այլն:

Այսպիսով, արտայայտչական համակարգի միջոցները լայն գործածութիւն ունեն, եւ մարդիկ աշխատում են օգտուել դրանցից՝ խօսքը արտայայտիչ, ինչպէս նաեւ ներգործուն դարձնելու նպատակով: Խօսքի արտայայտչական միջոցները դրսեւորւում են լեզուի բոլոր մակարդակներում: Դրանց վերաբերեալ ուսումնասիրութիւնները շարունակւում են ցայսօր: Որպէս վերջին աղբիւր ծառայում է ԵՊՀ Հայոց լեզուի ամբիոնի կողմից հրատարակուած «Հայոց լեզու եւ խօսքի մշակոյթ» գիրքը, որում ներկայացւած են արտայայտչական գրեթէ բոլոր միջոցները՝ թարմ օրինակներով:

ՎԱՆՏԵՐ ՊԵՐՊԵՐԵԱՆ

ԵՊՀ Հայ բանասիրութեան ֆակուլտետի դասախօս

